

尚書義考

尙書義考卷二

帝曰咨四岳朕在位七十載汝能庸命異

德忝帝位曰明明揚側陋師錫帝曰有齔

帝曰俞予聞如何岳曰瞽子父頑母嚚象

烝烝乂不格姦帝曰我其試哉

爾雅朕我也忝辱也師眾也錫賜也俞然也諧和也

烝進也格至也試用也

陸氏德明曰朕馬云我也異馬云讓也

黃氏度曰易

巽火火出而木泯也

否不也虞氏舜名也馬云舜謚也舜死後

賢臣錄之臣子爲諱故變名言謚

史記集解鄭玄曰言汝諸侯之中有能順事用天命

者入處我位統治天下之事者乎

孔氏穎達曰文王世子論舉賢之法云或以事舉或以言揚揚亦舉也王肅云古者將舉大事訊羣吏訊萬人堯將禪位咨四岳使問羣臣眾舉側陋眾皆讓與舜堯計事之大者莫過禪讓必應博詢吏人非獨在位鄭以師爲諸侯之師王肅云虞地名也皇甫謐云堯以二女妻舜封之於虞今河東太陽山西虞地是也然則舜居虞地以虞爲氏堯封之虞爲諸侯及王天下遂爲天子之號故從微至著常稱虞氏鄭玄云試以爲臣之事王肅云試之以官鄭王皆以舜典合於此篇故指歷試之事充此試哉之言

孔傳曰巽順也言四岳能用帝命故欲使順行帝位之事也錫與也無妻曰鰥無目曰瞽舜父有目不能分別好惡故時人謂之瞽配字曰瞍瞍無目之稱也心不則德義之經爲頑象舜弟之字也傲慢不友言竝惡也烝進也使進進以善自治不至於姦惡也蘇氏曰巽受也明其高明者揚其側陋者言不擇貴賤也姦亂也舜能以孝和諧父母昆弟使進於德不及於亂

林氏之奇曰瞽者無目人也蓋舜父名瞽瞍詩曰矇矍奏公則瞍亦無目稱也以其無目故名曰瞽瞍猶云黑臀黑肩之類史記云盲者之子則舜父之無目

也審矣孔氏說非也

馬氏驥繹史曰史記重華父曰瞽瞍瞽瞍父曰橋牛

大戴禮  
橋作嶠

橋牛父曰句望

大戴禮  
望作芒

句望父曰敬康敬康

父曰窮蟬窮蟬父曰帝顓頊呂梁碑云舜祖幕幕生窮蟬窮蟬生敬康敬康生喬牛喬牛生瞽瞍瞽瞍生舜中無句望一世史記所敘黃帝以至三王皆同族異號舜亦黃帝苗裔蓋堯之羣從玄孫屬也先儒非之曰以堯舜爲同族則二女之妻幾於嬪姓亂序路史據國語以爲舜之系出於虞幕獨不祖黃帝余因是反覆詳究不獨舜不祖黃帝卽顓頊亦不當祖黃帝國語史伯之言曰成天地之大功者其子孫未嘗

不章虞夏商周是也虞幕能聽協風以成樂物生

章昭

注幕卽虞思非也

左傳史趙之言曰自幕至於瞽瞍無違命

舜重之以明德是舜之祖幕審矣國語又曰幕能帥

顓頊者也左氏傳又曰陳顓頊之族也是幕之祖顓

頊亦審矣史記之誤由於輕信世本

世本一書出於周末采記前代

之世次必多遺脫史記用之而不知其察也

然如窮蟬以下諸名必非鑿

空增設再加以虞幕而幕亦未必卽顓頊之子窮蟬

之父也國語少昊氏之衰九黎亂德顓頊受之蓋少

昊一代之通稱非當其世而遽衰也然則顓頊之去

黃帝中間曠隔何得爲黃帝之孫昌意之子且顓頊

不知傳歷幾世而後高辛氏興將帝嚳上至黃帝又

不止三世矣

春秋命歷序曰黃帝傳十世少昊傳八世顓頊傳二十世帝嚳傳十世此雖緯

議雜說不足深信然而足以補遷史之疏濟諸說之窮未可盡棄也古者帝王一代之

興必建立名號至於世及相承則因之而不改

太皞十五

世皆襲庖犧氏之號神農八世皆以炎帝稱何獨黃帝之後世世殊稱也

哉漢書帝系曰顓頊五世而生鯀則鯀又非顓頊之

子是夏之上世史有遺脫矣左傳稱高陽氏之才子

八愷高辛氏之才子八元此十六族者世濟其美

杜預

注云皆其苗裔

夫高辛之苗裔堯未能舉是譽堯亦非父子

相承

或高辛氏歷世既久及摯而衰堯始起而代之

則堯之上世史亦有遺

脫矣

案我其試哉之上孔穎達云馬鄭王本說此經

皆無帝曰史記於此作堯曰吾其試哉東晉所  
出之古文尙書殆因史記之文加之耳舜祖虞  
幕是以世稱虞氏馬宛斯論少皞顓頊帝嚳帝  
堯其上世史皆失考足以祛疑解惑少皞顓頊  
帝嚳非黃帝後堯及稷契非帝嚳後治經者不  
可不知也

女子時觀厥刑于二女釐降二女子于嬀汭嬪于虞帝曰  
欽哉

爾雅刑法也降下也嬪婦也

酈氏道元水經注蒲坂縣魏秦州刺史治太和遷都  
罷州置河東郡郡南有厯山有舜井嬀汭二水出焉



南曰媯水北曰汭水西逕厯山下尙書所謂釐降二  
女于媯汭也王肅曰媯汭虞地名馬季長曰水所出  
曰汭然則汭似非水名而今見有二水異源同歸渾  
流西注入於河

孔氏穎達曰以女妻人謂之女鄭云不言妻者不告  
其父不序其正媯水在河東虞縣厯山西西流至蒲  
坂縣南入於河虞與媯汭一地分爲二文汭水涯也

鄭云汭之言內也

史記索隱曰皇甫謐云媯水在河東虞鄉縣厯山西汭水涯也猶洛

汭渭汭然也正義曰括地志云媯水源自蒲坂河東南山按地志云河東郡青山東山中有二泉下南流者媯水北流者汭水二水異源合流出谷西注河解氏季宣曰媯水出解州解縣至河中河東縣入河汭大水也

陸氏德明曰汭水之內也杜預注左傳云水之隈曲曰汭

孔傳曰舜爲匹夫能以義理下帝女之心於所居媯水之汭使行婦道於虞氏也

蘇氏軾曰婦敬曰嬪虞其族也舜能使二女不獨敬其親而通敬其族

朱子語錄曰我其試哉至於二女皆堯言釐降至於虞乃史官之辭帝曰欽哉是堯戒二女之辭釐釐訓治釐降止是經理二女下降時事

案女于時觀厥刑于二女此史臣之辭女于時言于是女之史記云于是堯妻之二女是也古

人便文倒句多如此媯水在今山西蒲州府南三十里因其兩源雙導後人遂以媯汭二字分而名之蓋出於方俗之附會不足據證汭說文水相入也旣曰于媯汭又曰于虞辭繫不省者釐降堯治嫁事也嬪則爲婦也公羊春秋天子嫁女於諸侯必使諸侯同姓者主之帝女下嫁蓋使媯汭之諸侯主之禮或然歟

慎徽五典五典克從納于百揆百揆時敘賓于四門四門穆穆納于大麓烈風雷雨弗迷

爾雅徽善也典常也經也揆度也時是也穆穆敬也美也

陸氏德明曰徽王云美也馬云善也麓王云錄也馬

鄭云山足也

史記索隱曰穀梁傳云林屬於山曰麓是山足曰麓

史記集解鄭玄曰五典五教也蓋試以司徒之職馬融曰四門四方之門諸侯羣臣朝者舜賓迎之皆有美德也

孔氏穎達曰鄭玄以賓爲擯謂舜爲上賓以迎諸侯王肅云堯得舜任之事無不統自慎徽五典以下是也

孔傳曰五典五常之教父義母慈兄友弟共子孝揆度也度百事總百官麓錄也使大錄萬機之政陰陽和風雨時各有其節不有迷錯愆伏

程子曰五典謂父子有親君臣有義夫婦有別長幼

有序朋友有信也五者人倫也言長幼則兄弟尊卑

備矣言朋友則鄉黨賓客備矣王氏應麟困學紀聞曰五典克從孔傳本

於左氏程子解本孟子左氏言五教不及君臣

夫婦朋友天敘有典而遺其三焉惟孟子得之

蘇氏軾曰徽和也或曰大麓泰山麓也古者易姓告

代必因泰山除地爲禪以告天地故謂之禪其禮既

不經見而堯乃於未告舜禪之前先往泰山以易姓

告代豈事之實也哉林氏之奇曰納于大麓所謂薦

謂使之主祭而百神享之是也說者以謂麓地名也

即禹貢所謂大陸既作也又說者以謂麓泰山之足

若梁父之類然經無明文孔氏謂陰陽和風雨時既

日陰陽和風雨時則不應又有烈風雷雨也程子曰

無烈風雷雨之迷錯其辭亦不順孫博士曰陰陽以

散而生風至於烈風則陰陽之極也陰陽薄而成雷

陰陽亨而成雨雷雨則陰陽相成之極也陰陽之極多迷而不復常則爲物之害聖人在上德足以當天心雖風之烈而雷雨不至於迷而害物則陰陽之不失其序此說粗通矣時氏闢曰大麓之說不同曰泰山之麓者頗近意堯使舜攝行祭事於泰山之麓孟子云使之主祭而百神享之言至祭而風雨不迷陰陽和調也朱子語錄問納大麓恐是爲山虞之官曰若此則其職益卑且合從史記說雖遇烈風雷雨弗迷其道也若主祭之說某不敢信若是

舜主祭而乃有烈風雷雨豈是好事

太史公曰堯

使舜入山林川澤暴風雷雨舜行不迷此其實也堯

之所以試舜者亦多方矣洪水爲患使舜入山林相

視原隰雷雨大至眾懼失常而舜不迷其度量有絕

人者

蔡氏沈曰遇烈風雷雨非常之變而不震懼失常非固聰明誠智確乎不亂者不能也易震驚

百里不喪匕

鬯意爲近之

案慎微五典敷教於天下也納于百揆總百官

也賓于四門率諸侯也納于大麓蓋嘗有巡行  
在外之時舉其所經所值一事言之古者山林  
荒遠之地易於迷失故易曰卽麓無虞惟入于  
林中言就山麓而無虞人導之則將陷入于林  
莽之中迷不知所嚮也上三者德禮政教之顯  
而此尤足以見立德之本聖人之誠敬所存若  
滯於一端求之則非矣

帝曰格汝舜詢事考言乃言底可績三載汝陟帝位舜

讓于德弗嗣

弗嗣當從古本作不治

爾雅格來也至也詢謀也底致也陟陞也怡樂也

陸氏德明曰底王云致也馬云定也

史記舜讓於德不懌集解鄭玄曰三年者賓四門之後三年也徐廣曰今文尙書作不怡怡懌也

史記索隱曰今文作不怡怡卽懌也謂辭讓於德不

堪所以心意不悅懌也

胡氏士行曰天地萬物之責一旦將任之惕然如不勝此

堯之兢兢舜之業業文王之純亦不已非具文之遜也

孔傳曰乃汝也汝言致可以立功三年矣

董氏鼎曰陸農師點

乃言底可績三載句朱氏升曰訪問所行之事而稽考所言則汝言致之可有功三載矣舜讓于

德不堪不能嗣成帝位也

林氏之奇曰王氏云讓于德者讓有德之人也弗嗣弗肯陟帝位以嗣堯也

許氏謙曰讓德弗嗣之下王魯齋先生謂堯試舜如



此之詳而讓德弗嗣之下無再命之辭巽位之際亦無丁寧告戒之語何也按論語堯曰篇首二十字乃此脫文也

案舜讓于德蓋以己之德不堪爲辭如岳之言否德忝帝位者史臣約略之但曰讓于德云耳堯舜之讓本以天下爲重任而其身無樂有天下之心旣無樂有天下之心則堯以重任授舜舜豈宜辭而不受如曰讓于有德之人則便當舉此人如岳之舉舜否則讓屬虛文聖人豈爲之哉然必無不讓者臨事而懼之誠雖小節必恐其不勝況任天下重器而不爲之變動恐懼

則非也是以至德猶懼德薄史臣記其授受之時不怡見於貌不怡也者惕然內變精誠外著也古字嗣怡聲同毛詩子寧不嗣音韓詩作不詒音亦怡嗣互出之證若以不嗣帝位爲解則於聖人之仁以天下爲己任聖人之心不以己爲至德二者合而爲一之極致與夫聖人之誠讓非虛文皆不可見且下文受終以承弗嗣亦扞格不可通矣此一字之誤關於至道者非淺小也

正月上日受終于文祖

陸氏德明日王云文祖廟名馬云文祖天也天爲文

萬物之祖故曰文祖

史記文祖者堯大祖也

孔傳文祖者堯文德之祖廟也蘇氏軾曰上日上旬日也

受堯之終必於堯之祖廟有事於祖廟則餘廟可知王氏炎曰文祖堯所從受天下者也集解馬

融曰上日朔日也鄭玄曰文祖者五府之大名猶周之明堂

史記正義曰鄭玄云帝王易代莫不改正堯正建丑舜正建子此時未改堯正故云正月上日也

孔氏穎達曰鄭玄以爲帝王易代莫不改正堯正建丑舜正建子此時未改堯正故云正月上日卽位乃改堯正故云月正元日是異文先儒王肅等以爲惟殷周改正易民視聽自夏以上皆以建寅爲正此

篇二文不同史異辭耳

林氏之奇曰上日曾氏云所謂上辛上丁上戊之類然月令仲春之月擇元日命民社則元日亦不必爲朔日也受終而不言舜者蒙上之文也薛氏云受天下於人必告於其人之從受者此論當矣

在璿璣玉衡以齊七政

璿璣當從古本作旋機

爾雅在察也

史記集解鄭玄曰璇璣玉衡渾天儀也七政日月五

星也

陳氏大猷曰人有政耳天豈有政乎曰此但譬喻之辭日月五星司天之政亦猶人之有政也

故以政言之耳

史記正義蔡邕云玉衡長八尺孔徑一寸下端望之

以視星宿蓋縣機以象天而以衡望之轉機窺衡以知星宿機徑八尺圓周二丈五尺而強也鄭玄云運轉者爲機持正者爲衡隋書天文志馬季長創謂機衡爲渾天儀鄭玄亦云其運轉者爲機其持正者爲衡皆以玉爲之七政者日月五星也以機衡視其行度以觀天意也孔傳曰七政日月五星各異政舜察天文齊七政以審己當天心與否也朱子語錄曰孔注謂舜察天文齊七政以審己當天心與否未必然止是從新整理起此是最先當理會者

孔氏穎達曰馬融云渾天儀可轉旋故曰機衡其橫簫所以視星宿也以璿爲機以玉爲衡蓋貴天象也日月星皆以璿璣玉衡度知其盈縮進退失政所在史記天官書北斗七星所謂璇璣玉衡以齊七政索隱曰馬融云璿美玉也機渾天儀可轉旋故曰機衡其中橫簫以璿爲機以玉爲衡蓋貴天象也七政者北斗七星各有所主第一曰主日法天第二曰主月

法地第三日命火謂熒惑也第四日殺土謂填星也  
第五日伐水謂辰星也第六日危木謂歲星也第七  
日罰金謂太白也日月五星各異政故曰七政也

尙書大傳璇璣者何也傳曰璇者還也機者幾也微  
也其變幾微而所動者大謂之璇璣是故璇璣謂之  
北極

案璇璣玉衡先儒徒據漢以後之渾天儀爲說  
皆失之揚雄法言或人問渾天於雄雄曰洛下  
閎營之鮮于妄人度之耿中丞象之幾幾乎莫  
之違也渾天之器創於此三人遂以其轉旋名  
之曰璇璣以其中之窺管名之曰玉衡雖襲取  
古名非唐虞時所謂機衡也考之周髀算經謂

赤道極曰正北極謂黃道極曰北極璇璣正北極者左旋之樞北極璇璣者右旋之樞左旋之樞卽論語爾雅之北辰隋書天文志謂之不動處者也右旋之樞環繞正北極晝夜一周而過一度冬至夜半起正北極下子位夏至夜半起正北極上午位春分夜半起正北極左卯位秋分夜半起正北極右卯位是爲璇璣四游卽吳太常姚信昕天論所云冬至極低夏至極高者也璇璣順月建推移夜半所至用知日躔發斂而黃道之高下亦昭然矣衡橫也橫界冬夏至相距四十餘度之間古有分至啟閉謂之八節

準以設衡宜爲衡者五外衡冬至內衡夏至中  
衡春秋分自內而外爲之次五衡相距不均其  
於黃道得均分之限八日躔斂北入次四衡爲  
春入次二衡爲夏當其衡啟也日躔發南出次  
二衡爲秋出次四衡爲冬當其衡閉也周髀之  
七衡六間則當其衡爲十二中氣當其間爲十  
二節氣惜乎漢以來爲渾天儀未能深考機衡  
本象使古者測天之器不傳釋堯典者因漢製  
附會故似同而異似是而非鄭康成以日月五  
星謂之七政其注尙書大傳又云七政謂春夏  
秋冬天文地理人事所以爲政也司馬子長作



天官書馬季長注尙書皆以爲北斗七星三說參差非有明證堯典厯象日月星辰星謂中星初不及五緯洪範五紀一曰歲二曰月三曰日四曰星辰五曰厯數其星辰同於堯典孔穎達曰五星所行下民不以爲候其說得之五星至後代推測漸詳堯命羲和敬授民時無取乎此卽推之不失亦非正四時成歲攸關何以與此月竝列稱七政乎天道遠不必盡知無傷於大智如日月食五星掎犯古人皆不豫推惟日月運行寒暑物候因之變遷準是出政乃敬天時重民事也然則政之爲言實人有政非天有政

甚明以人之有政論其一爲歲之政分至啟閉  
如祭祀典禮登臺書雲物之屬是也其一爲月  
之政如聽朔朝廟之屬是也旣謹因歲月以明  
其節之大于是遂順時序而舉夫木火土金水  
五者之政如法制禁令協天時而布其事是也  
皋陶謨曰撫于五辰庶績其凝堯典曰庶績咸  
熙庶績之熙也凝也由政之得宜而政之得宜  
由順天在璿璣玉衡者審驗天行也以齊七政  
者齊人事合天也庶績熙凝之本也

肆類于上帝

陸氏德明曰王云上帝天也馬云上帝太一神在紫

微宮天之最尊者

孔傳曰肆遂也

程子曰肆遂也猶後之屬文者言於是也

禮記疏曰異義夏侯歐陽說類祭天者以事類祭之

古尙書說非時祭天謂之類許慎謹案周禮郊天無

言類者知類非常祭從古尙書說

史記正義曰五經異義云非時祭天

謂之類言以事類告也

鄭氏無駁與許同也鄭又以

類雖非常祭亦比類正禮而爲之故小宗伯注云類

者依其正禮而爲之是也

孔氏類達曰詩云是類是禱周禮肆師云類造上帝

王制云天子將出類乎上帝所云類者皆是祭天之

事言以事類而祭也周禮少宗伯云天地之大裁類

社稷則爲位是類之爲祭所及者廣

蘇氏軾曰凡祀上帝必及地亦何以知其然也以郊

遺其四方于下取其中以爲六宗四時寒暑日月眾  
星并水旱所宗者八非但六也傳曰山川之神則水  
旱厲疫之災於是乎祭之日月星辰之神則雪霜風  
雨之不時於是乎祭之又曰龍見而雩如此祭者祀  
日月星辰山川之名雩者周人四月祭天求雨之稱  
也雪霜之災非天祭之可禳雩祭之禮非正月之所  
祈周人之後說有虞之興故于學者未盡喻也且類  
于上帝卽禮天也望于山川祭所及也案周禮云昊  
天上帝日月星辰司中司命風師雨師社稷五祀五  
嶽山林川澤四方百物又曰兆五帝於四郊四類四  
望亦如之無六宗之兆祭法云祭天祭地祭時祭寒  
暑日月星祭水旱祭四方及山林川谷丘陵能出雲  
爲風雨見怪物皆曰神有天下者祭百神非此族也  
不在祀典復無六宗之文明六宗所禮卽祭法之所  
及周禮之所記卽虞書之所宗不宜特復立六宗之  
祀也春官大司馬之職掌玉作六器以禮天地四方  
以蒼璧禮天以黃琮禮地以青珪禮東方以赤璋禮  
南方以白琥禮西方以玄璜禮北方天宗日月星辰  
寒暑之屬也地宗社稷五祀之屬也四方之宗者四  
時五帝之屬也如此則羣神咸秩而無廢百禮徧修  
而不瀆於理爲通幽州秀才張髦又上疏曰禮于六  
宗祀祖考所尊者六也何以考之周禮及禮記王制

天子將出類乎上帝宜乎社造乎禘巡狩四方觀諸  
侯歸格于祖禘用特堯典亦曰肆類于上帝禋于六  
宗望于山川徧于羣神班瑞于羣后肆觀東后協時  
月正日同律度量衡巡狩一歲一周爾乃歸格于藝  
祖用特臣以尚書與禮王制同事一義符契相合禋  
于六宗正謂祀祖考宗廟也文祖之廟六宗則三昭  
三穆也太學博士吳商以爲禋之言煙也三祭皆積  
柴而實性體然以升煙而報陽非祭宗廟之名也鄭  
所以不從諸儒之說者將欲據周禮禋祀皆天神也  
日月星辰司中司命風師雨師凡八而日月并從郊  
故其餘爲六宗也以書禋于六宗與周禮事相符故  
據以爲說也且文昌雖有大體而星名異其目不同  
故隨事祭之而言文昌七星不得偏祭其第四第五  
此爲周禮復不知文昌之體而又妄引爲司中司命  
箕畢二星旣不係於辰且同是隨事而祭之例又無  
嫌於所繫者范甯注虞書曰考覲眾議各有說難鄭  
氏證據最詳是以附之案六宗義眾未知孰是虞書  
別論云地有五色太社象之總五爲一則成六六爲  
地數推案經句闕無地祭則祭地臣昭謂虞喜以祭  
地近得其實而分彼五色合爲六又不通禋更成疑  
昧尋虞書所稱肆類于上帝是祭天天不言天而曰  
上帝帝是天神之極舉帝則天神斯盡日月星辰從

可知也。禋于六宗是實祭地地不言地而曰六宗宗是地數之中舉中足以該數社稷等祀從可知也。天稱神上地表數中仰觀俯察所以爲異宗者崇尊之稱斯亦盡敬之謂也。禋也者蕤祭之言也。實蕤瘞之異稱非周禋之祭也。夫遣字涉神必以今之示今之示卽古之神所以社稷諸字莫不以神爲體。虞書不同祀名斯隔周體改燵音形兩異。虞書改二正元祭義此焉非疑以爲可了。豈六置宗更爲旁祭乎。風俗通曰周禮以爲樵燎祀司中司命文昌上二星也。樵燎積薪燔柴也。今民猶置司命耳。刻木長尺二寸爲人像行者署篋中居者別作小居齋地大尊重之。汝南諸郡亦多有者。皆祀以豬率以春秋之月。

陸氏德明曰禋王云絜祀也。馬云精意以享也。六宗王云四時寒暑日月星水旱也。馬云天地四時也。

史記集解鄭玄曰六宗星辰司中司命風師雨師也。駟案六宗義眾矣。愚謂鄭說爲長。

案覲禮諸侯覲于天子爲宮方三百步四門壇

十二有尋深四尺加方明于其上方明者木也  
方四尺設六色東方青南方赤西方白北方墨  
上玄下黃設六玉上圭下璧南方璋西方琥北  
方璜東方圭天子出拜日于東門之外反祀方  
明禮日於南門外禮月與西瀆于北門外禮山  
川丘陵于西門外祭天燔柴祭山丘陵升祭川  
沈祭地瘞鄭注云方明者上下四方神明之象  
也有象者猶宗廟之有主乎六色象其神六玉  
以禮之司盟職曰北面詔明神言北面詔明神  
則明神有象也象者其方明乎燔柴升沈瘞祭  
禮終矣備矣郊特牲曰郊之祭也迎長日之至

也大報天而主日也宗伯職日以實柴祀日月  
星辰則燔柴祭天謂祭日也柴爲祭日則祭地  
瘞者祭月也據儀禮方明之祀行之于合諸侯  
以春拜日夏禮日秋禮月與四瀆冬禮山川丘  
陵分之於四時出所爲宮之門外行燔柴升沈  
瘞之禮而皆反祀方明於壇蓋變堯典類上帝  
禋六宗望山川徧羣神者損益用之方明卽六  
宗也漢書引伊訓曰伊尹祀于先王誕資有牧  
方明是周沿于殷之證殷初宜承乎夏實上起  
唐虞矣周禮大宗伯以玉作六器以禮天地四  
方以蒼璧禮天以黃琮禮地以青圭禮東方以



赤璋禮南方以白琥禮西方以玄璜禮北方與  
典瑞四圭有邸以祀天兩圭有邸以祀地者異  
然則大宗伯之六器禮天地四方卽祀方明所  
用六玉矣五經異義載今尙書歐陽大小夏侯  
說指上下四方之宗其說必傳之自古周人旣  
祀昊天上帝又祀五帝而合諸侯又祀方明則  
唐虞之旣類上帝又禋六宗事固相因者也

望于山川

孔傳曰九州名山大川五嶽四瀆之屬皆一時望祭  
之

徧于羣神

史記辯於羣神集解徐廣曰辯音班駟案鄭玄曰羣神若上陵墳衍

輯五瑞既月乃日覲四岳羣牧班瑞于羣后

爾雅覲見也班賦也后君也

陸氏德明曰輯王云合馬云斂也

史記集解馬融曰輯斂也五瑞公侯伯子男所執以爲瑞信也堯將禪舜使羣牧斂之使舜親往班之

孔傳曰既盡班還也舜斂公侯伯子男之瑞圭璧盡以正月中乃日日見四岳及九州牧監還五瑞於諸

侯與之正始

蘇氏軾曰古者朝覲贊王已事則還之故始輯而終班程子曰輯斂五瑞徵五

等諸侯也至月終則四方諸侯至矣遠近不同來有先後故日日見之不如他朝會之同期於一日也蓋

欲以少接之則得盡其詢察之意也既見則頒還其瑞玉

劉氏敞七經小傳曰輯五瑞者收諸侯圭瑞還之王府既月乃日者既正月之明日謂二月朔耳輯五瑞必俟既月之明日頒之諸侯者以新厯數也

案日者擇其日之謂朝覲禮大待諸侯齊至然後擇覲日史記所謂擇吉月日是也言輯五瑞則知諸侯咸至言班瑞于羣后則知同時覲而班之

歲二月東巡守至于岱宗柴望秩于山川

爾雅河東岱泰山爲東岳祭天曰燔柴漢書地理志泰山郡博岱山在西北

史記集解馬融曰舜受終後五年之二月鄭玄曰建卯之月也柴祭東嶽者考積柴燎也

春秋公羊傳隱公八年疏鄭注歲二月者正歲建卯之月也巡守者行視所守也岱宗者東岳名也柴者考積柴燎也望秩於山川者徧以尊卑祭之五岳視三公四瀆視諸侯其餘小者或視卿大夫或視伯子男矣秩次也

陸氏德明曰馬云祭時積柴加牲其上而燔之

詩周頌般疏堯典注云徧以尊卑次秩祭之

後漢志注范甯曰巡守者巡行諸侯所守二月直卯故以東巡守也祭山曰燔柴積薪加牲於其上而燔

之也

孔傳曰諸侯爲天子守土故稱守巡行之既班瑞之  
明月乃順春東巡守岱宗泰山爲四岳宗燔柴祭天  
告至也

林氏之奇曰歲二月者來歲之二月故加歲一字於  
其中蓋前一年羣后來朝故至明年舜乃巡狩考制  
度於四岳非與觀岳牧頒瑞用在一年之中  
蔡氏沈  
日歲二  
月當巡守之  
年二月也

案岱宗應劭云宗者長也爲五岳之長是也山  
在今山東泰安府治北五里

肆觀東后協時月正日同律度量衡修五禮五玉三帛

二生一死贄如五器卒乃復

爾雅卒已也終也復返也

陸氏德明日玉云同齊也律六律也馬云律法也鄭云同陰律也

史記集解馬融曰五禮吉凶軍賓嘉也三帛三孤所執也贄二生羔鴈卿大夫所執一死雉士所執五器

上五玉禮終則還之三帛已下不還

孔傳曰復還也器謂圭璧也程

子曰諸侯尊而贄重故已覲則復還其玉餘則否所以禮答別辟也五器卽五瑞以其物言則玉以其寶言則瑞以成形言則器

春秋公羊傳隱公八年疏鄭注東后東方之諸侯也協正四時之月數及日名備有失誤者度丈尺量斗

斛衡斤兩五禮公侯伯子男朝聘之禮矣

程子曰所至協正時

日同其度量正五等諸侯之秩序制度之等差是修五禮也五等之制古有之矣防其亂故巡守所至必修明也正其五等制度并其五玉瑞節執之曰瑞陳君臣所執圭幣皆使合理也

列日至也三帛所以薦玉也受瑞王者以帛薦之帛必三者高陽之後用赤繪高辛之後用黑繪其餘諸侯皆用白繪周禮改之爲纁也二生一死者贊羔鴈生也卿大夫所執雉死士所執也如者以物相授與之言授贄之器有五卿大夫上士中士下士也器各異飾飾未聞所用也周禮改之飾羔鴈飾雉執之而已皆去器卒已也復歸也巡守禮畢乃反歸矣每歸用特牛告於文祖矣

孔氏穎達曰王肅云三帛纁玄黃也附庸與諸侯之適子公之孤執皮帛其執之色未詳間或曰孤執玄諸侯之適子執纁附庸執黃王肅之注尙書其言多同孔傳如若也聘義曰以圭璋聘重禮也已聘而還圭璋此輕財而重禮之義也聘義主於說聘其朝禮亦然

劉氏敞曰如者同也五器者吉凶禮樂及戎器同之一制度也蔡氏沈曰五玉三帛二生一死贊此九字當在肆覲東后之下協時月正日之上劉侍講曰五器卽五禮之器也卒乃復者數事皆畢則不復東行而遂西向且轉而南行也故曰卒乃復

案五禮以周之吉凶軍賓嘉言者非也蓋不惟唐虞時未必分設此名此五者乃人事之經鉅



細畢核委曲繁重豈覲於方岳下之頃所能舉而修之後儒兼以五器爲五禮之器其器又何以備稽哉當從鄭說爲公侯伯子男朝聘之禮率羣后行之卽所以修明之也時月正日布政之大者正日謂正朔也律度量衡法制之大者公侯伯子男各依其命數之儀爵秩等威之大者於巡守協之同之修之皆一時所能徧之大端不可使之或失者也下卽言所執五等玉瑞及諸臣所執幣物爲贄其贄若五玉之器禮終乃還之以覲時禮儀所關故接修五禮之下覲禮曰乃朝以瑞玉聘禮曰凡四器者惟其所寶

注云四器謂圭璋璧琮此器玉瑞互稱之明證

五月南巡守至于南岳如岱禮

爾雅江南衡霍山爲南岳漢書地理志長沙國湘南

禹貢衡山在東南荊州山

王制疏曰爾雅釋山霍山爲南岳郭注云山在衡陽

湘南縣南又云今在廬江灊縣西漢武帝以衡山遼  
曠因議緯皆以霍山爲南岳故移其神於此其土俗  
人皆呼之爲南岳南岳本自以兩山爲名非從近也  
而學者多以霍山不得爲南岳又以漢武帝始乃名  
之卽如此言謂武帝在爾雅前乎斯不然矣如郭此  
言則南岳衡山自有兩名一名衡山一名霍山自漢  
武帝以來始徙南岳之神於廬江霍山耳爾雅疏曰  
孫炎以霍山爲誤當作衡山案書傳虞夏傳及白虎  
通風俗通廣雅竝云霍山爲南岳豈諸文皆誤明是  
衡山一名霍山也注卽天柱山潛水所出此據作注  
時霍山爲言也此山本名天柱漢武帝移江南霍山  
之祀於此故又名霍山其經之霍山卽江南衡是也

案衡山在今湖廣衡州府衡山縣西北三十里

接衡陽及長沙府界水經注云山經謂之岫嶺  
山爲南岳也

八月西巡守至于西岳如初

爾雅河南華華山爲西岳漢書地理志京兆尹華陰  
故陰晉太華山在南豫州山

案西岳華山禹貢謂之太華今在陝西同州府  
華陰縣南十里其西八十里有少華峰勢相連  
西京賦曰綴以二華是也九域志華山四州之  
際東北冀東南豫西南梁西北雍

十有一月朔巡守至于北岳如西禮

當從馬鄭  
本作如初

爾雅河北恒恒山爲北岳漢書地理志常山郡上曲

陽恒山北岳在西北并州山

陸氏德明曰至于北岳如西禮方輿本同馬本作如初

春秋公羊傳隱公八年疏鄭注五月不言初者以其文相近八月十一月言初者文相遠故也

案今直隸定州曲陽縣西有上曲陽故城韓琦岳廟碑曰恒山一名大茂山也

歸格于藝祖用特

陸氏德明曰藝馬王云禰也

程子曰歸格告至于祖廟也止言祖廟舉尊耳

實皆告也四時之祭則各有牲如告朔告至之類非祭也共用一牲而已故云用特薛氏季宣曰藝祖王考也孔子論巡守禮告於祖廟考廟舜時瞽瞍尚在故但告王考也

孔氏穎達曰四巡之後乃云歸格則是一出而周四

岳鄭玄以爲每岳禮畢而歸仲月乃更復去

林氏之奇曰一

年而巡四岳胡舍人尚計其地理考其日程而謂不能周歷萬五千里若巡一岳歸至于仲月復往則一歲周數萬里此必無之理也

孔傳曰巡守四岳然後歸告至文祖之廟藝文也

蔡氏

沈曰藝祖疑卽文祖或曰文祖藝祖之所自出亦未有所考證也

言祖則考著特一

牛

案歸而告至事祖禩之道也藝祖當爲舜之祖

以爲文祖者非也前受終義繫乎堯故於堯之

祖此告至義繫乎舜於舜之祖審矣

五載一巡守羣后四朝敷奏以言明試以功車服以庸

爾雅庸勞也

陸氏德明曰四朝馬王皆云四面朝於方岳之下鄭云四朝四季朝京師也

史記集解鄭玄曰巡守之年諸侯見於方岳之下其

間四年四方諸侯分來朝於京師也

蔡氏沈曰五載之內天子巡守

者一諸侯來朝者四蓋巡守之明年則東方諸侯來朝於天子之國又明年則南方之諸侯來朝又明年則西方之諸侯來朝又明年則北方之諸侯來朝又明年則天子復巡守

孔傳曰敷陳奏進也諸侯四朝各使陳進治理之言明試其言以要其功功成則賜車服以表顯其能用也

程子曰自歲二月以下言巡守之事非是當年二月

便往亦非一歲之中徧歷五岳也每五載一巡守則一方之諸侯朝於岳下故曰四朝巡守非能徧至諸國也至方岳則覲見一方之君使各進陳其爲治之說其言之善者則從之而明考其功有其功則賜車服以旌其功也

劉氏倣曰五載一巡守者唐虞氏分天下五服其在畿內甸服之君則皆執事之人也朝夕見焉故不特修朝覲之禮至于侯服當朝一年綏服當朝二年要服當朝三年荒服當朝四年綏服下諸侯畢見一朝一朝則天子巡守故五載一巡守也

林氏之奇曰周官之六年五服

一朝又六年王乃時巡考制度於四岳諸侯各朝于方岳大明黜陟此則唐虞之禮也但其年歲久近之

不同耳胡氏既疑舜之時不能一載而巡守謂一年而東一年而南一年而西一年而北此羣后所以四朝也五載之中一歲息駕信如此說則是諸侯惟朝天子於方岳之下而未嘗朝於京師也五載一巡守蓋巡守於方岳之下而諸侯來朝京師則有敷奏以言明試以功車服以庸之三事也蓋苟以封建爲國則巡守朝覲之時不可以不嚴周東遷之後此禮皆廢於是強陵弱眾暴寡大併小而周道陵夷不可復振論者不探其本如柳子厚則以封建爲不可行此蓋未嘗深考唐虞致治之績也陳氏大猷曰葉氏謂侯綏要荒各年一朝四年而周是一歲朝一服之侯也夫聖人詳內略外要荒之君政事尙從疏闊豈與侯綏之諸侯均責其四歲一朝乎周官止言六年五服一朝而不及於四服記言四塞世告至正爲此也孫氏謂甸服之君朝夕見焉故無朝覲之禮夫唐虞甸服不以封至侯服始有采謂甸服之有君已不合矣至謂侯服一年一朝則是服之間四年四朝也以綏服兩年一朝則是四年兩朝也要服三年一朝則不及四年而朝惟荒服爲四年一朝耳概之四朝之數皆不合兼要荒必無四年一朝之理

案鄭氏說一歲周於四岳之下謂之一巡守而



分四方諸侯以四年徧來一朝謂之四朝不可也況禹貢之甸侯綏要荒五服必唐虞相承之制以定朝貢之節而甸服外之百里始爲卿大夫采邑未有諸侯其外之百里男邦又其外之三百里諸侯此於京師不出千里雖歲一朝尙不爲數綏服分內之三百里揆文教外之二百里奮武衛於京師踰千里又其外要服荒服益遠矣周官大行人職曰邦畿方千里其外方五百里謂之侯服歲一見又其外方五百里謂之甸服二歲一見又其外方五百里謂之男服三歲一見又其外方五百里謂之采服四歲一見

又其外方五百里謂之衛服五歲一見又其外  
方五百里謂之要服六歲一見九州之外謂之  
蕃國世一見謂夷服鎮服蕃服也周官經言方  
則面二百五十里周之侯甸當禹貢侯服男采  
當禹貢綏服衛要當禹貢要服夷鎮當禹貢荒  
服然則禹貢之侯服周且分一歲二歲矣綏服  
分三歲四歲要服分五歲六歲而荒服世乃一  
見者也豈唐虞不分遠近爲等差不然矣意羣  
后四朝特以侯服言之此外別有年限略而不  
言也上記攝帝位之初巡守至方岳下因舉歲  
一朝之諸侯有敷奏以言明試以功車服以庸

之法本非於此詳言制度故不備舉敷如敷求  
之敷徧也故史記作徧告以言庸如功庸之庸  
國語曰無功庸者不敢居位

肇十有二州封十有二山濬川

爾雅肇始也濬深也

史記集解馬融曰禹平水土置九州舜以冀州之北  
廣大分置并州燕齊遼遠分燕置幽州分齊爲營州  
閭氏若璩曰青之分而爲營也不獨以地廣於是爲  
實以吏民艱於涉海故別置一州以避其險於是爲  
十二州也程子曰上古九州治水之後禹別正其九  
州之封界舜始分爲十二州在洪水既平  
後鄭立曰更爲之定界治水害也

孔傳曰封大也每州之名山殊大之以爲其州之鎮

程子曰封十有二山蓋表其山爲一州之鎮耳蔡氏沈曰如職方氏言揚州其山鎮曰會稽之類有流川則深之使通利

孔氏穎達曰左傳云昔夏之方有德也貢金九牧則

禹還置九州其名蓋如禹貢其境不可知也陳氏櫟曰舜卽

位之初咨十有二牧後又曰州十有二師則舜世分九州爲十二州審矣左氏宣三年昔夏之方有德也

貢金九牧則至夏禹之世又并十二州爲九州亦審矣

蘇氏軾曰封封殖也十二州之名山皆禁採伐也林氏

之奇曰洪水既平之後封殖其山而加樹藝焉凡十有二州之山皆封殖之如九州刊旅謂凡九州之山

皆得刊木而旅祭也陳氏大猷曰王氏說封山則材木不可勝用濬川則穀米不可勝食張氏推其說以

爲此王道之始正合孟子之言如何曰肇州封山濬川皆疆理地勢之事故連言之王說乃虞衡之職不

應言於肇州之後若以爲王道之始何不及分田制產之事乎

案周禮有并州幽州爾雅有營州孔穎達以爲職方爾雅州名必因於古是也濬古字通說文濬深通川也分州表鎮通川蓋舜初攝帝位時事此與巡守類敘殛鯀與象以典刑類序其實因鯀功用弗就故舜有濬川之政殛鯀興禹斷非一時鯀旣殛禹未興舜必慎求其人而後得禹計舜卽位後命官禹作司空未數年故仍勉其平水土前以司空治水後以百揆治水也舜攝二十八載而禹治水時方娶是鯀遏在羽山禹之年甚幼固顯然者方鯀殛死憂在洪水有浚川之政及後之命禹治水兩不相蒙濬川

者舜救一時之患舉禹者舜定萬世之安禹治

水舜既分十二州矣故曰州有十二師而作貢

又在後復別爲九州時有所宜各從其宜而已

象以典刑流宥五刑鞭作官刑朴作教刑金作贖刑眚

災肆赦怙終賊刑欽哉欽哉惟刑之恤哉

恤當從古本作謚

爾雅典常也經也怙恃也

史記集解馬融曰言咎繇制五常之刑無犯之者但

有其象無其人也流放宥寬也一曰幼少二曰老耄

三曰蠢愚五刑墨劓剕宮大辟

朱子語錄問五刑吳才老說是五典之刑

如所謂不孝不弟之刑曰此是亂說人有罪合用五刑如何不用困學紀聞云范蜀公正書曰舜之五刑流也官也教也贖也賊也流宥五刑者舜五流以宥三苗之劓剕刑剕宮大辟皇王大紀之說本諸此而以

墨劓荆宮大辟蘇氏賦曰官刑為辨治官事者為刑官刑以治

為賊刑之科目庶人在官慢於事金黃金也意善功惡使出黃金贖

而未入於刑者罪坐不戒慎者鄭玄云朴槓楚也朴為教官為刑者

孔傳云不勤道業則撻之眚眚為人作患害者也過失雖有害則

赦之怙其姦邪終身以為殘賊則用刑之孔氏曰春秋言肆眚

者皆謂緩縱過失之人蘇氏曰易曰無妄行有眚眚亦災也眚災者猶曰不幸非其罪也終不改也賊害

也恃惡不悛以害人則刑之徐廣曰今文云惟刑之謚哉爾雅曰

謚靜也

陸氏德明曰馬云有三宥也

史記正義鄭玄云三宥一曰弗識二曰過失三曰遺

忘也

周禮司刑疏鄭注堯典云正刑五加之流宥鞭朴贖此之謂九刑者

孔氏穎達曰鄭玄曰其輕者或流放之四罪是也王肅云謂君不忍刑殺宥之以遠方言宥有五刑則正五刑見矣

孔傳曰象法也法用常刑用不越法也孔氏穎達曰五刑雖有常

法所犯未必當條皆須原其本情然後斷決使不越法眚過災害肆緩賊殺也

過而有害當緩赦之怙姦自終當刑殺之也程子曰象以典

刑象罪之輕重立爲常典眚謂過失入於罪者災謂非人所致而至者赦除釋之也眚者肆之災者赦之也雖罪非固犯失由於人故必致法矜其情而緩之耳災非由人宜加恤也故直赦之怙恃其惡與終固其非者凶惡之民也故殘害之以刑使不得爲人害也是賊刑也



蘇氏軾曰典刑常刑也殺人者死傷人者刑象其所

犯黃氏度曰象者像也像其事也刑作五流之法以

宥五刑之輕者墨薄刑也其宥乃至於流乎曰刑者

終身不可復而流者有時而釋不賢於刑之乎過誤

而入於刑與罪疑者皆入金以贖蔡氏沈曰據此經

而無金贖周禮秋官亦無其文至呂刑乃有五等之

罰疑穆王始制之非法之正也蓋當刑而贖則失之

輕疑赦而贖則失之重且使富者

幸免貧者受刑又非所以爲平也

林氏之奇曰王氏云象者垂以示人之謂若周官垂

法象魏是也此說比先儒爲長蓋王者之法如江河

必使易避而難犯故必垂以示之使知避之周官司

寇正月之吉始和布刑于邦國都鄙乃縣刑象之灋

于象魏使萬民觀刑象挾日而斂之此則唐虞之象以典刑之意也而說者多以象刑爲畫象其說出於大傳與漢帝之詔辭氏又論世俗以爲畫衣冠異章服爲象刑豈非讀舜典而誤與此說有理

案象刑之義林氏所論當矣蘇氏謂過誤而入於刑與罪疑者皆入金以贖此與肆其眚者之亦屬過誤何一入金一緩縱歟馬融以爲意善功惡坐不戒愼是準是論刑不得謂之過誤而意雖可原宜以不戒愼罰之金者也罪與人同意與人異乃入於此眚本自眚惜其義爲一時迷謬得過之名災本天災絕無因而入於罪戾

何書卷之二  
斯名爲災故眚則肆之災則赦之有恃而犯爲  
怙長惡不悛爲終春秋傳叔向之言曰殺人不  
忌爲賊此三者皆必刑詩假以溢我左傳引作  
何以恤我說文引作譖以謚我毛詩訓溢爲慎  
義出爾雅而溢慎謚爾雅又皆訓靜故史記云  
惟刑之靜哉謚之爲靜雖爾雅正訓而謚刑爲  
慎刑義尤切至

流共工于幽洲放驩兜于崇山竄三苗于三危殛鯀于  
羽山四罪而天下咸服

洲當從古  
本作州

陸氏德明曰王云三苗國名

孔氏穎達曰鄭玄云舜不刑此四人者以爲堯臣不

忍刑之林氏之奇曰殛餘于羽山說者多以爲殺之遂舉洪範殛則殛死之言爲證是不然使蘇  
之罪果在所當殺則直殺之矣何必殛之羽山洪範所謂殛死者正如後世史傳言貶之也太祖皇帝讀書歎曰堯舜之始四凶之罪止從投竄何近代法網之密也

史記集解馬融曰三苗國名也幽州北裔也崇山南

裔也三危西裔也殛誅也羽山東裔也程子曰流者去遠之也如

水流去放者屏斥之竄者投置之殛則誅死之也

孔傳曰幽洲北裔水中可居曰洲也崇山南裔三苗

國名縉雲氏之後爲諸侯號饕餮三危西裔也殛竄

放流皆誅也異其文述作之體也羽山東裔在海中

也孔氏類達曰左傳說此事言投諸四裔釋地云燕日幽州禹貢羽山在徐州三危在雍州三者所居

皆言山名共工所處不近大山故舉州言之此流四凶在治水前於時未作十有二州則無幽州之名而

云幽州者史據後定言之禹貢無崇山不知其處蓋在衡嶺之南也昭元年左傳說自古諸侯不用王命者虞有三苗夏有觀扈杜預言三苗地闕不知其處鄭玄具引左傳之交乃云命驩兜舉其工則驩兜爲渾敦也其工爲窮奇也縣爲檣杪也而三苗爲饕餮亦可知漢書地理志羽山在東海郡祝其縣西南洪範云縣則殛死禹乃嗣興僖三十三年左傳云舜之罪也殛縣其舉也與禹襄二十一年左傳云殛鯀而禹興皆言殛鯀而後用禹爲治水而鄭玄以爲禹治水事畢乃流四凶故王肅難鄭言若待禹治功成而後以鯀爲無功而殛之是爲舜用人子之功而流放其父則禹之勤勞適足使父致殛爲舜失五典克從之義禹陷三千莫大之罪進退無據亦甚迂哉韓氏季宣曰三苗舊說爲岳州地蓋以吳起所稱洞庭彭蠡與韓嬰衡山準之羽山三危皆見禹貢幽州今燕雲路舜十二州之一也密古嵩字漢世嵩高猶曰密高今交趾驩州及澧州澧陽縣鄂州崇陽縣皆有崇山稱放驩兜之地皆傳會之說耳

案幽州史記作幽陵又稱顓頊四方所及北至於幽陵幽州之名或起於幽陵矣今順天府密

雲縣東北塞外有故共城括地志作龔城於秦漢屬漁陽郡崇山今在湖廣澧州永定縣西漢武陵郡充縣也三苗吳起所云三苗之國左洞庭右彭蠡是也今爲湖廣武昌岳州二府江西九江府地三危黑水所經後人以古瓜州之山當之謂之三危山在今嘉峪關外漢敦煌地左氏春秋允姓之姦居於瓜州不言三苗而敦煌之水不得入南海今所謂三危山者其下亦無水以當黑水則三危宜近怒江今怒江實古黑水也羽山在今登州蓬萊縣東南三十里古萊夷地寰宇記縣南有鯀城四罪皆流耳說文殛

殊也漢詔曰骨肉之親絜而不殊言明於仁恩而不離絕是殯卽離絕之謂古人一事累言之往往變其文後人因字附會求罪之重輕非也二十有八載帝乃殯落百姓如喪考妣三載四海遏密入音

爾雅殯落死也

林氏曰人之死也魂氣歸於天故父謂之殯體魄降於地故謂之落

爲考母爲妣遏止也密靜也

史記堯立七十年得舜二年而老

今史記各本皆作二十年而老十字

衍今舜攝行天子之政薦之於天堯辟位凡二十八

年而崩

孔傳曰堯年十六卽位七十載求禪試舜三載自正月上日至崩二十八載堯凡壽百一

十七歲也孔氏穎達曰案求禪之年卽得舜而試之求禪試舜共在一年也更得二年卽爲歷試三年故

王肅云徵用三載其一在徵用之年其餘二載與攝位二十八人凡三十歲也以此計之惟有百一十六歲不得有七蓋誤也蔡氏沈曰堯十六卽位在位七十載又試舜三載老不聽政二十八載乃崩在位通計百單一年王氏天與曰邵子皇極經世紀堯甲辰年卽位癸丑徵舜登庸乙卯遜於位至舜二十八年乃殂落通在百姓悲哀如喪父母三年黃氏度曰臣位一百年爲君服三年始於此

此四方莫舉樂以思堯集解徐廣曰堯在位凡九十八年駟案皇覽曰堯冢在濟陰城陽劉向曰堯葬

濟陰丘隴山呂氏春秋曰堯葬穀林皇甫謐曰穀林

卽城陽

史記正義曰括地志云堯陵在濮州雷澤縣西三里郭緣生述征記云城陽縣東有堯冢

亦曰堯陵有碑是也括地志云雷澤縣本漢城陽也堯都平陽於詩爲唐國

案古字密謚通詩夙夜基命宥密賈誼新書引

作宥謚說文云謚無聲也



月正元日舜格于文祖

爾雅元始也

孔氏穎達曰王肅云月正元日猶言正月上日變文耳禮云令月吉日又變文言吉月令辰此之類也

詢于四岳闢四門明四目達四聰

爾雅詢謀也

詩緇衣疏舜典云闢四門者注云卿士之職使爲己

出政教

金氏履祥曰闢四門者來四方之賢明四目

岳職也

王氏充耘曰詢于四岳非謀治於四岳之官

蓋咨詢皆命官之辭

作書者變文錯綜用字耳下文

闢四門明四目

達四聰卽四岳職事若以詢四岳非

命四岳以職事則後面總命二十二

人無乃次一人

乎

天下言四門者亦因卿士之私朝在國門魯有東

門襄仲宋有桐門右師是後之取法於前也

孔傳曰開闢四方之門未開者廣致眾賢也廣視聽

陳氏大猷曰明四目達四聰不過謂使四方之聞見

皆無壅於上耳

案四岳總四方之諸侯鄭注以闢四門明四目

達四聰爲其職得之

咨十有二牧曰食哉惟時柔遠能邇惇德允元而難任人蠻夷率服

爾雅咨謀也柔安也邇近也惇厚也任佞也率循也孔氏穎達曰王肅云能安遠者先能安近

孔傳曰所重在於民食惟當敬授民時也元善之長

也言當安遠乃能安近厚行德信使足長善佞人斥遠之則忠信昭於四夷皆相率而來服也

蘇氏軾曰能讀如不相能之能柔懷遠者使與近者相能

林氏之奇曰此則咨在外之十有二牧也李校書曰能者耐也古者能耐同字能邇者居上以寬之謂也其意蓋以能邇爲耐邇者若俗所謂忍耐得事恐亦不然謂能邇爲居上以寬者亦非也某竊謂惇德允元而難任人此能邇之道也德者有德也元者善人也曰惇曰允厚之信之之謂也難者遏絕之使不得進也自古蠻夷所以敢憑陵中國者皆由守土之臣

不能用寬厚長者之道行優游寬大之政以忠信鎮服蠻夷邀功生事開邊鄙之隙者眾也

案詩大雅柔遠能邇鄭箋云能猶卽也安遠方之國順卽其近者釋文云能徐云毛如字鄭奴代反卽檢字書未見所出廣雅云如若也均也義音相似而字則異舊音如庶反義亡難見疏云謂順適其意也能邇謂惠中國柔遠卽綏四方也今以聲義考之能而如若一聲之轉後漢督郵斑碑柔遠而邇易利建侯而不寧釋文云鄭讀而曰能能猶安也禮運聖人耐以天下爲一家注云耐古能字疏云亦有誤不安寸直作

而字劉向說苑能字皆爲而也爾雅若善也順也蓋柔有使之馴伏意能有與之調善意下敦德允元對文則柔遠能邇之爲對文明矣

舜曰咨四岳有能奮庸熙帝之載使宅百揆亮采惠疇僉曰伯禹作司空帝曰俞咨禹汝平水土惟時懋哉禹拜稽首讓于稷契暨皋陶帝曰俞汝往哉

爾雅宅居也亮導也右也采事也惠順也時是也懋勉也

史記集解馬融曰奮明庸功也鄭玄曰然其舉得其人汝往居此官不聽其所讓也

孔氏穎達曰鄭玄云載行也王肅云載成也鄭云時

天下賴后稷之功故以官名通稱

周禮疏堯典伯禹作司空鄭云初堯冬官爲共工舜舉禹治水堯知其有聖德必成功故改命司空以官名寵異之非常官也至禹登百揆之任舍司空之職爲共工與虞故曰垂作共工益作朕虞

陸氏德明曰懋王云勉也馬云從也

孔傳曰奮起庸功載事也訪羣臣有能起發其功廣

堯之事者亮信也求其人使居百揆之官信立其功

順其事者誰乎

蘇氏軾曰奮立也有能立功光堯之事者當使宅百揆其能信事而順者

誰乎禹代鯀爲崇伯入爲天子司空居稷官者棄也契

皋陶二臣名也稽首首至地也

林氏之奇曰爾雅左右亮也以是亮有輔相之義亮

采者輔相朝廷之事疇如九疇之疇謂天下之事各

以其類無不順也

蔡氏沈曰亮明也一說亮相也舜言奮起事功以廣帝堯之事者使

居百揆之位以明亮庶事而順成庶類也以司空兼百揆如周以六卿兼三公也

時氏瀾曰惠疇者謂順天下人才而任之人各有所長順而任之而已

案百揆於百官之事無不統禹以司空治水舜謀百揆之官皆以禹方爲司空對故舜則舉其所爲未竟者命之終事考國語諸書內而百僚外而羣牧皆佐禹治水者禹治水總百官可知亮采史記作相事卽其義也古字疇儔通

帝曰棄黎民阻飢汝后稷播時百穀

爾雅阻難也后君也

朱子曰后謂有部之君所謂時三后后夔皆有爵土之稱也

是也

陸氏德明曰阻王云難也

詩周頌思文傳黎民阻飢后稷播殖百穀釋文曰馬

融注尚書作祖云始也

史記舜曰棄黎民始飢集解徐廣曰今文尚書作祖飢祖

始疏曰舜典注云祖讀曰阻阻厄也時讀曰蒔始者

洪水時眾民厄於飢汝居稷官播蒔五穀以救活之

周禮疏汝后稷注稷棄也初堯天官爲稷

孔氏穎達曰王肅云播敷也

史記正義曰播時謂順四時而種百穀



孔傳曰播布也眾民之難在於飢汝后稷布種是百穀以濟之美其前功以勉之也

案阻之義爲難爲厄時常訓是

帝曰契百姓不親五品不遜汝作司徒敬敷五教在寬  
史記集解曰鄭玄曰五品父母兄弟子也王肅曰五

五常也馬融曰五教五品之教

孔氏類達曰品謂品秩一家之內尊卑之

差卽父母兄弟子是也教之義慈友恭孝此事可常行乃爲五常耳文十八年左傳曰布五教於四方父義母慈兄友弟恭子孝是布五常之教也蘇氏軾曰以此教民必寬而後可亟則以德爲怨否則相率爲僞陳氏大猷曰敷有宣布二義宣謂闡明之布謂班行之兼此二義方能敷教

孔傳曰遜順也

林氏之奇曰五品五典之教皆言人倫也竊謂左傳

之言不如孟子之說爲盡

案鄭氏注辯章平姓爲羣臣之父子兄弟國語  
言百姓亦云王公之子弟韋昭以官族釋之蓋  
百官卽拔出其中故欲其昭明欲其親愛遜順  
此黎民所視之以從化而無違戾也父子君臣  
夫婦昆弟朋友有尊卑少長之差故稱五品孟  
子之言親義別序信則五教也

帝曰皋陶蠻夷猾夏寇賊姦宄汝作士五刑有服五服  
三就五流有宅五宅三居惟明克允

史記集解鄭玄曰猾夏侵亂中國也馬融曰士獄官  
之長五刑墨劓剕宮大辟三就謂大罪陳諸原野次

罪於市朝同族適甸師氏既服五刑當就三處五流  
謂在八議君不忍刑宥之以遠五等之差亦有三等  
之居大罪投四裔次九州之外次中國之外當明其  
罪能使信服之孔氏穎達曰定十年左傳云裔不謀  
七年左傳云亂在外爲姦在內爲宄周禮司寇之屬  
有士師卿士等皆以士爲官名鄭玄云士察也主察  
訟獄之事月令云命大理昭十四年左傳云叔魚攝  
理是謂獄官爲理官也舊語云刑五而已大刑用甲  
兵次刑斧鉞中刑刀鋸其次鑕窄薄刑鞭朴以威民  
故大者陳之原野小者致之市朝五刑三次所言三  
次卽此三就是也惟死罪當分就處所其墨劓剕宮  
無常處可就也馬鄭王三家皆以三就爲原野也市  
朝也甸師氏也案刑於甸師氏者王之同族刑於隱  
者不與國人慮兄弟耳非所刑之正處此言正刑不  
當數甸師也又市朝與所不得合以爲一王肅云惟  
明其罪能使之信服薛氏季宣曰禮大刑用甲兵則  
蠻夷盜賊之事亦領於士師也

周禮司刑疏舜典云寇賊姦宄鄭注云強聚爲寇殺人爲賊起內爲姦起外爲宄御姦以德御宄以刑

禮記王制疏虞書曰五流有宅五宅三居鄭注云宅讀曰咤懲刈之器謂五刑之流皆有器懲刈五咤者是五種之器謂桎一梏二箠三三處者自九州之外至于四夷三分其地遠近若周之夷服鎮服蕃服

孔傳曰猾亂也士理官也服從也言得輕重之中正也旣從五刑謂服罪也行刑當就三處大罪於原野大夫於朝士於市也五刑之流各有所居五居之差有三等之居大罪四裔次九州之外次千里之外林氏之奇曰此非境外之蠻夷舜之世九州之內蓋

有蠻夷與吾民錯居境內冀州揚州之蠻夷青州之  
萊夷徐州之淮夷梁州之和夷是也王氏云行刑者  
或就重或就輕或就輕重之中此之謂三就流者或  
居遠或居近或居遠近之中此之謂三居此說爲善  
蓋教臯陶原情而定罪耳此所貴於惟明克允也  
黃氏度曰服言罪各有狀使服其刑呂刑上服下服  
是也五刑以輕重爲三等曰三就就猶成也成其罪  
也大辟重宮刑次之墨劓又次之刑有五流而宥之  
亦有五若今所謂加役牢城不刺面之等當時宜有  
其名也而亦以所居遠近爲三等曰三居  
朱子曰三就若大辟則就市宮刑則如漢時就蠶室

其墨劓剕既非死刑則就僻處當風必致殺人聖人  
既全其生不忍如此三居如居四海之外九州之內  
或近甸皆以輕重爲差

孫氏覺曰惟明則情僞畢知克允則輕重適當

陳氏大猷

曰夏氏謂惟明則能  
原情定罪得其允當

應氏鏞曰刑與事稱之謂服就者獄辭之成者一就  
之不足而至於再再就之不足而至於三謂三就也  
易曰革言三就豈非參錯審訂省其已成之說乎周  
禮有三刺三赦三宥之法王制三公以獄之成告於  
王王三宥然後制刑蓋雖後世斷刑尙有三覆奏五  
覆奏者況隆古之盛乎

案服謂服罪之實狀也宅史記作度謂流有等差審度當其輕重也就居以處所言者近之

帝曰疇若予工僉曰垂哉帝曰俞咨垂汝其工垂拜稽首讓于及斨暨伯與帝曰俞往哉汝諧

爾雅諧和也

史記集解馬融曰工謂主百工之官也其工爲司空其理百工之事

孔傳曰垂臣名也其謂其其職事及斨伯與二臣名也

蘇氏軾曰諧宜也

王氏充耘曰禹讓稷契皋陶而用

稷契皋陶伯夷讓夔龍而用夔龍故皆不言汝諧是聽其讓也益讓朱虎熊羆而未嘗用朱虎熊羆垂讓及斨伯與而未嘗用及斨伯與故

各言汝諸言惟汝  
可以宜此職耳

林氏之奇曰禹讓稷契皋陶三人也則曰讓于稷契  
暨皋陶伯夷讓于夔龍一人也則曰讓于夔龍此之  
所讓與禹正同然中加暨字則其爲三人也無疑矣  
父一也斯二也伯與三也  
朱子曰父以積竹爲兵建  
兵車者斯方鑿斧也古多  
以其所能爲名父斯  
豈能爲二器者與

案父斯暨伯與當從林氏說爲三人此三人應  
是工官之佐仍各居其官可知汝諧者與其佐  
協和在官也

帝曰疇若予上下草木鳥獸僉曰益哉帝曰俞咨益汝  
作朕虞益拜稽首讓于朱虎熊羆帝曰俞往哉汝諧  
僉曰



當從古本  
作禹曰

史記集解馬融曰上謂原下謂隰虞掌山澤之官名  
孔氏穎達曰馬鄭王本皆爲禹曰益哉鄭立云言朕  
虞重鳥獸草木

孔傳曰上謂山下謂澤朱虎熊羆二臣名也

史記索隱曰卽

高辛氏之子  
伯虎仲熊也

林氏之奇曰朱虎熊羆據左傳載高辛氏之子有伯  
虎仲熊虎與熊旣爲二人則朱與羆亦當爲二人矣  
蔡氏沈曰意以獸爲名者亦  
以其能服是獸而得名歟朱博士云及斯伯與三  
人也故言暨以別之朱虎熊羆四人也故不言暨此  
說爲善

案朱虎熊羆當從林氏說爲四人史記云舜曰  
往矣汝諧遂以朱虎熊羆爲佐亦以汝諧之云  
該及其所薦者

帝曰咨四岳有能典朕三禮僉曰伯夷帝曰俞咨伯汝  
作秩宗夙夜惟寅直哉惟清伯拜稽首讓于夔龍帝曰  
俞往欽哉

爾雅夙早也寅敬也

史記集解馬融曰三禮天神地祇人鬼之禮也鄭玄  
曰天事地事人事之禮也主秩次尊卑

孔傳曰伯夷臣名姜姓也

孔氏穎達曰鄭語云姜伯夷之後也伯夷能禮於神

以佐堯是伯夷爲姜姓也林氏之奇曰國語以姜姓爲四岳之後又以爲伯夷之後韋昭遂謂卽四岳經

云客四岳有能典朕三禮僉曰伯夷豈四岳以是自薦也揆之人情決不如此則伯夷之爲姜姓雖先儒有所據而云宗尊也主郊廟之官也孔氏穎達曰此時秩宗卽周禮亦未可信之大宗伯也蔡氏沈曰典主也宗祖廟也秩宗主敘次百神之官而專以秩宗名之者蓋以宗廟爲主也周禮亦謂之宗伯而都家皆有宗人之官以掌祭祀之事亦此意也王氏天與曰夏氏曰宗如宗主之宗故長子主器謂之宗子秩宗云者豈非以天秩之禮而是禮彼實主之乎故成周掌邦禮者謂之宗伯掌都家之禮者謂之都宗人家宗人夔龍二臣名也

案周始分吉凶軍賓嘉爲五禮唐虞時統名天地人之禮耳此三禮者五禮畢具其中鄭康成禮論曰唐虞有三禮至周分爲五禮是也伯夷四岳何必不皆姜姓林氏疑之未當

帝曰夔命汝典樂教胄子直而溫寬而栗剛而無虐簡

而無傲詩言志歌永言聲依永律和聲八音克諧無相奪倫神人以和

爾雅永長也

陸氏德明曰王公胄子國子也馬云胄長也教長天下之子弟

史記集解鄭玄曰胄子國子也聲之曲折又依長言聲中律乃爲和也神人以和祖考來格羣后德讓其一隅也馬融曰正直而色溫和寬大而謹敬戰栗也歌所以長言詩之意也

孔傳日子謂天子以下至卿大夫子弟也聲謂五聲宮商角徵羽也律謂六律六呂十二月之音氣也倫

理也

陳氏大猷曰諸是眾音和協倫是各音條理

蘇氏軾曰敎者必因其所長而輔其所不足直者患不溫寬者患不栗剛者患虐簡者患傲聲者樂聲也永者人聲也樂聲升降之節視人聲之所能至則爲中聲是謂聲依永

案聲律皆所以均節高下之度數也歌以永長其言而五聲隨其鉅細所中故曰歌永言聲依永也律則準聲之鉅細調和之使成節奏故曰律和聲凡作樂以人聲爲本而金石絲竹匏土革木之八音應之

夔曰於予擊石拊石百獸率舞

蘇氏軾曰此舜命九官之際也無緣夔於此獨稱其功此益稷之文也簡編脫誤復見於此劉氏敞曰益稷之末又有夔曰於予擊石拊石百獸率舞然則舜典之末衍一簡也何以知之邪方舜之命二十二人不讓者惟夔龍爲否則亦已矣又自贊其能夔必不爲也時氏闕曰或者以爲簡脫亦未可知不然夔若自言其功蓋聞舜之言心領神受曰於予擊拊之際百獸尙將率舞則神人以和可知

案蘇氏劉氏以此條爲簡編衍誤得之然史記於此命官亦載夔之言則漢初已訛舛矣

帝曰龍朕聖讒說殄行震驚朕師命汝作納言夙夜出納朕命惟允

爾雅殄絕也震動也震驚懼也

史記集解鄭玄曰所謂色取仁而行違是驚動我之

眾臣使之疑惑

孔傳曰聖疾也言我疾讒說絕君子之行而動驚我眾欲遏絕之也納言喉舌之官也聽下言納於上受上言宣於下必以信也

蘇氏軾曰絕行獨行行之不可繼者也

陳氏櫟曰愚謂欲其審君命之當否當者出之否者納之惟在於允當如後世批勅之官庶於朕命二字明順

案周禮稻人夏以水殄草而芟夷之鄭注云殄病也絕也讒說殄行謂足以傷病人之德行舉其爲害之實也出納朕命不得專爲聽下言納

於上詩大雅烝民篇曰出納王命王之喉舌鄭箋云出王命者王口所自言承而施之也納王命者時之所宜復於王也然其官名納言且告之曰朕聖讒說殄行震驚朕師是讒說之可畏欲其審察下言不惑於讒說然後出納上之命出者出宣之也納者入陳之也蓋上之命既允則直出宣之上之命未允則必入陳其當否歸於允乃出之故曰夙夜出納朕命惟允陳氏謂如後世批剌之官得之

帝曰咨汝二十有二人欽哉惟時亮天功

史記集解馬融曰稷契皋陶皆居官久有成功但述



而美之無所復勅禹及垂以下皆初命凡六人與上  
十二牧四岳凡二十二入鄭玄曰皆格于文祖時所  
勅命也

孔氏穎達曰鄭玄云自咨十有二牧至帝曰龍皆月  
正元日格於文祖所勅命也鄭以爲二十二入數父  
斯伯與朱虎熊羆不數四岳

蘇氏軾曰堯欲使巽朕位則非四人明矣二十二人  
蓋十二牧四岳九官也而舊說以爲四人蓋每訪四  
岳必僉日以答之訪者一而答者眾不害四岳之爲  
一人也亮弼也

林氏之奇曰此四岳九官十二牧當有二十五人但

言二十二人者蓋或有兼居岳牧之任者或有在州牧之中而居九官之列者不得而知也

案二十有一人皆主達官言之故不數及斯伯與及朱虎熊羆蘇氏以四岳一人合十二牧九官適二十二人得之四岳百揆皆官名必無命百揆而不命四岳者詢于四岳咨十有二牧是就其舊職詢之咨之國語曰咨親爲詢殊其文以別異之非不命以職事者也

三載考績三考黜陟幽明庶績咸熙分北三苗

爾雅績事也業也功也

史記集解鄭玄曰所竄三苗爲西裔諸侯者猶爲惡

乃復分析流之

孔氏穎達曰鄭玄以爲流四凶者卿爲伯子大夫爲男降其位耳猶爲國君故以三苗爲西裔諸侯猶爲惡乃復分北流之王肅云三苗之民有赦宥者復不從化不令相從分北流之

孔傳曰九歲則能否幽明有別黜退其幽者升進其明者

蘇氏軾曰苗之國在洞庭右彭蠡南方之國也而竄之西裔必竄其君耳其民未也至此治功大成而苗民猶不服故分北之

惠氏棟曰分北三苗北讀爲別北穴字相似說文于

八部曰夂別也又丫部曰夂古文別許君學于賈逵  
逵傳古文尙書必得其實虞翻曰鄭注尙書分北三  
苗北古別字又訓北言北猶別也若此之類誠可怪  
也棟謂北字似別非古別字又北與夂異不得言北  
爲別也虞翻皆失之苗本一也分別流之故有三苗  
猶三危本一也三苗分三危之地亦因分別而言蓋  
依三居之法離絕之使不得通也

案前言竄三苗于三危此言分北三苗皋陶謨  
言苗頑弗卽功皆兼其君民言之三苗應是同  
在一地而其別有三仍分三處竄之危蓋地名  
分其地爲三故曰三危後人以卑羽山三峰傳

會三危之名於黑水遠矣分北者未竄之餘民  
弗卽功者分別之使各隨其君也蓋其頑亦可  
矜徙之不使居舊土而已

舜生三十徵庸三十在位五十載陟方乃死

爾雅徵召也陟陞也

史記舜年二十以孝聞年三十堯舉之年五十攝行  
天子事年五十八堯崩年六十一代堯踐帝位踐帝  
位三十九年南巡守崩於蒼梧之野葬於江南九疑  
是爲零陵集解皇甫謐曰舜所都或言蒲阪或言平  
陽或言潘潘今上谷也皇覽曰舜冢在零陵營浦縣其  
山九谿皆相似故曰九疑傳曰舜葬蒼梧象爲之耕

禮記曰舜葬蒼梧二妃不從山海經曰蒼梧山帝舜葬於陽帝丹朱葬於陰皇甫謐曰或曰二妃葬衡山史記正義曰括地志云平陽今晉州城是也潘今鳩州城是也蒲阪今蒲州南二里河東縣界蒲阪故城是也黃氏度曰案孟子舜卒於鳴條在安邑則舜故都也舜禪與堯有不同者舜世禹雖攝大政令猶自舜出故舜親巡守陟四方高山祭天觀諸侯謂之陟方頌曰陟其高山後世緣此謂之登封謂之升中辭氏季宣曰書傳多稱舜南巡守而崩于蒼梧九疑惟孟子以爲舜遷負夏卒於鳴條呂氏春秋舜葬於紀韓子以爲舜老而禹攝矣尙何南方之守且南方地下不可謂之陟方稽於呂孟之書其說當矣蒼梧山在海州界近莒之紀城舜後虞國在應天虞城鳴條亭在陳留之平邱負夏今兗州之瑕丘則蒼梧不在南也記曰舜葬蒼梧之野二妃未之從也今二妃墓在蒲坂

孔氏穎達曰鄭讀此經云舜生三十謂生三十年也登庸二十謂歷試二十年在位五十載陟方乃死謂

攝位至死爲五十年舜年一百歲也

孔傳曰方道也舜卽位五十年升道南方巡守死於

蒼梧之野而葬焉三十徵庸三十在位服喪三年其

一在三十之數爲天子五十年凡壽百一十二歲蘇氏

賦曰爲民者三十載歷試三載攝位二十八載通爲

三十堯崩舜服喪三年然後卽位蓋年六十二矣在

位五十載而崩壽百有一十二歲者以爲舜巡守南

方死於蒼梧之野韓愈以爲非其說曰陟方者猶曰

升遐爾書曰惟新陟王是也傳書者以乃死爲陟方

之訓蓋其章句而後之學者誤以爲經文此說爲得

之林氏之奇曰陟方者猶云升遐也乃死謂升遐而

死猶云帝乃殂落也楊子曰黃帝堯舜殂落而死與

陟方乃死文勢正同蔡氏沈曰韓子曰帝王之沒皆

曰陟陟昇也謂昇天也書曰殷禮陟配天言以道終

其德協天也故書紀舜之沒云陟其下言方乃死者

所以釋陟爲死也案此得之但不當以陟爲句絕耳

方猶雲祖平方之方

案陟方朱升注旁云巡守而升方岳於義爲近  
史記云南巡守崩於蒼梧之野葬於江南九疑  
與禮記合孟子所言多戰國時異說不必爲通  
證